



墓碑考

下

子 10

4621

2



410
4621
2



墓碑考卷下



伏見米谷寅子虎原稿
平安村上恒夫元君校補

題例

文體明辨曰墓誌銘論其題則有曰墓誌銘有誌有
銘者是也曰墓誌銘并序有誌有銘而又有序者是
也然云誌銘而或有誌無銘或有銘無誌者別體也
曰墓誌則有誌而無銘曰墓銘則有銘而無誌然亦
有單云誌而卻有銘單云銘而卻有誌者有題云誌
而卻有銘題云銘而卻有誌者皆別體也○墓碑文

卷下

其為體有文有銘又或有序而其銘或謂之詞或謂之系或謂之頌要之皆銘也文與誌大畧相似而稍加詳焉其或曰碑或曰碑文或曰墓碑昌黎集載故中散大夫少府或曰神道碑銘昌黎集載司徒兼侍中書令贈或曰神道碑銘并序或曰碑頌蔡中郎集載太尉皆別題也

恒夫按墓誌銘即壙銘與碑表別然墓碑亦曰墓誌說已見前其題并序二字或書或不書元稹工部員外郎杜甫墓誌銘并序文體明辨載其首書序曰

此蓋編輯之目而非碑實有此題然後世之碑多倣此例

而後書系曰銘曰系即謂誌也蔡邕郭有道碑文并序文選陳太丘碑文并序王仲寶褚淵碑文并序文選載題曰并序而無序曰王安石虞部郎中贈衛尉李公神道碑文體明辨載題不書并序而有序曰此類無定例并序小字旁書為例又按孫何碑解曰銘之不能盡者復前之以序而編錄者通謂之文徐伯魯曰有文有銘文與誌大畧相似二說不同然要皆以文與銘為二也而文選所載郭有道陳太丘褚淵碑文皆題曰文并序而有序與銘則此文即謂銘也柳州故殿中侍御

史柳公墓表不書銘曰而書文曰其義同

墓碣為文與碑相類而有銘無銘惟人所為故其題

有曰碣銘有曰碣有曰碣頌并序

唐文粹載陳子昂作昭夷子趙氏碣

頌并序是也皆碣體也至於專言碣而卻有銘或兼言銘

而卻無銘則亦猶誌銘之不可為典要也

恒夫

按唐默仙中岳體元先生潘尊師碣文并序

見金石萃編

題曰碣文又一例也此文亦謂銘也

隸釋曰漢泰山都尉孔君之碑凡漢刊其首行即入

辭無額者或題其前如張納樊安之比亦甚少已篆

其上復標其端唯此碑爾

篆其上曰孔君之碑標其端曰孔君

呂祖謙文集曰銘誌既有題額更不當復寫某官墓

誌便當從頭直開誌文而銘銜則列於銘後乃為得

體

恒夫

按此銘誌有題額蓋是立于墓道者昌黎李

元賓墓誌柳州東明先生墓誌之類也壙誌所題

對書則蓋也非額也

墓銘舉例曰李文公唐故橫海軍節度齊棣滄景等

州觀察處置等使金紫光錄太夫上柱國貝郡開國

公食邑二千戶贈左僕射傅公神道碑題書官階勳

爵甚詳而序多畧又一例也蓋題為綱文為目綱既

詳之而目則畧者嫌于辭之繁也其綱舉其要而目致其詳者如韓文唐故河東節度觀察使滎陽鄭公神道碑文之類是也然綱畧而目詳者其常綱詳而目畧者其變故曰又一例也
按神道碑其題有二有碑額之題有碑文之題碑額之題簡碑文之題詳蓋既題其額又題其文也故韓文有錄其碑額之題者有錄其碑文之題者碑額之題如曹成王碑劉統軍碑之類碑文之題如唐銀青光祿大夫守左散騎常侍致仕上柱國襄陽郡王平陽路公神道碑銘唐故江南西道觀察使中大夫洪

州刺史兼御史中丞上柱國賜紫金魚袋贈左散騎常侍太原王公神道碑銘之類是也若蘇文忠公所謂碑身上更不寫題古制如此又謂碑只用大字額向下小字直寫文辭不須寫題目者施于宸奎閣碑與經藏碑耳非謂墓碑也公又嘗與人簡云墓表小字亦有題目額上不當復云墓表故列寫四大字也以此推之墓碑用兩題可見矣

恒夫

按此墓表亦有題額

墓碑銘始于漢洪适隸釋所載俱有額無題惟樊安碑首行有題無額額字有多至二十餘字者題額之

簡非例也既題額又題文亦非例也文忠實通言之耳別寫四大字者變也

恒夫按碑額題曰墓曰碑曰碣曰神道而碑文題

曰墓誌曰碑文曰碣銘曰神道碑銘則用兩題亦

無不可

水經注曰朱虛縣東北柴阜西南有魏獨行君子管寧墓墓前有碑又東北逕柴阜山之東有徵士邴原冢碑志存焉

六朝事迹曰齊獻武公墓在棲霞寺側有碑額曰齊故侍中尚書令丞相巴東獻公之墓

唐書曰韓思復卒天子親題其碑曰有唐忠孝韓長山之墓

張說嘗自為其父碑帝為書其額曰嗚呼積善之墓春明退朝錄曰皇祐中王侍郎融守河中還乃以唐

明皇所題裴耀卿碑額上之仁宗遂御篆沂公碑曰旌賢其後踵之者懷忠

德元老王太尉教忠積慶文潞公親賢李侍中褒親齊

獻穆公旌功曹襄悼舊學晏元獻崇儒丁文簡顯先積慶趙中令子

旌忠懷德張侍中儒賢高文莊褒賢范文正思賢劉丞相清

王武恭旌忠元勳狄武襄褒忠陳恭公純孝張文孝忠規德

範 宋元憲英 宗御篆 淳德守正 呂文穆 上御篆 大儒元老 賈魏公

寅按佩文齋書畫譜治跡統類曰元祐間詔賜富弼神道碑以顯忠尚德為額此類亦碑額之一體也

又按額有橫行有豎行詳于隸續

舜水談綺曰大明俗吉禮用偶數凶禮用奇數故卜

葬日必用單日 一三五 七九 凡銘旌石碑等文書其官爵

屬稱若會偶數 二四六 八 則加之字足以為奇如之柩

之墓之類也唯神主從吉用偶若會奇則亦加之字

大明俗凡修造墳墓必用十二月他月不用

寅按後漢蔡邕陳仲弓碑題額曰漢文範先生陳仲弓之碑為十字其他碑額加之字以為偶數者不暇枚舉

恒夫 按舜水所言蓋俗禮非古也季札銘人謂孔

子書曰嗚呼有吳延陵季子之墓而舜水莫議焉

大抵碑額多有之字而每行必合字數故或無之

字要其奇偶從便不必拘吉凶也至碑文之題則

一無之字墓碑墓碣墓表雖額亦無

金石要例曰名位著者稱公名位雖著同輩以下稱

君耆舊則稱府君昌黎集中有董府君獨孤府君張

孔君碑文之
題不曰碑銘
而曰之銘
為一例

府君衛府君盧府君韓府君有文名者稱先生如昌黎之稱施先生貞曜先生皇甫湜之稱昌黎韓先生友人則稱字如昌黎之于李元賓樊紹述張孝權元姚牧菴稱趙提刑夫人為楊君則變例也

恒夫

按唐制養德上園聲實明著則謚曰先生

凡僧稱某公者皆以其名宋景濂塔銘可案也今乃以其字稱公此村野驅鳥所為奈何文章家因之墓銘舉例曰柳子厚墓誌銘題不書官其字重於官也又一例也

施先生墓誌銘題不書官而書先生從諸生之稱也

又一例也貞曜先生墓誌題不書官與姓而書先生

從謚者之志尊之也又一例也

登封縣尉盧殷墓誌銘題書其名又一例也

盧渾墓誌銘題書其名非例也適其可也柳河東趙羣秀才墓誌題書其名雖非例亦韓文盧渾墓銘之類也

恒夫

按韓文又有韓滂墓誌銘

李文公故處士侯君墓誌君嘗仕矣而題書處士者蓋三縣皆攝仕猶不仕不足以免其高也又一例也

恒夫

按今之為處士者雖嘗有仕亦皆從此例

柳柳州東明張先生墓誌題繫其所居而書先生非例也學黃老者之常稱也

恒夫

按黃任香州齋集自注曰趙十五名壁陳叔

度名鴻皆工詩貧窮以死周櫟園侍郎為葬於小

西湖之側書石云明詩人趙十五陳叔度合墓

真娘唐時吳妓葬虎邱寺側乾隆十年陳鏞覆亭

立石書古真娘墓四字

又按余賓碩金陵覽古木末亭有方正學祠祠中

門牖皆北向今非復舊制祠南為正學墓門人廖

鏞所收葬也墓旁有土一封樹石碣書方氏十族

瘞骨處七字

見王漁洋精華錄注

息國夫人墓誌銘題書封而不書氏榮其封也又一

例也楚國夫人墓誌銘扶風郡夫人墓誌銘同息國

夫人誌例也

河南緱氏主簿唐充妻盧氏墓誌銘題書夫名又一

例也四門博士周況妻韓氏同唐充妻例也

柳宗元有小姪女墓輒記實銘詩也而無序題書墓

輒記又一例也

金石要例曰婦女之志以夫爵冠之如某官夫人某

氏或某官某人妻某氏庾信陳子昂張說獨孤及皆

然若子著名則以子爵冠之如柳子厚爲王叔文母誌書戶部侍郎王公先太夫人河間劉氏婦人後夫而死者其葬書祔葬權德輿集中宏農楊氏河東縣柳氏博陵縣崔氏皆如此例

恒夫按朝鮮國王后陵誌其首題曰有明朝鮮國孝順恭懿仁聖王后孝陵誌其後書曰萬曆六年二月日謹誌不著撰者名

柳州云凡葬大浮圖無窳穴其於用碑不宜然柳州之爲浮圖碑多矣今釋氏之葬不曰碑銘而曰塔銘者猶存不宜用碑之義也

恒夫按文體明辨曰至釋老之葬亦得立碑以僭擬乎品官豈歷代相沿崇尚異教而莫之禁歟故或直曰碑或曰碑銘或曰塔碑銘并序或曰碑銘并序亦別題也蓋塔猶墳也與碑爲二故或曰塔碑銘不可相混碑本立石之謂也秦漢以降刻文謂之碑則今立石刻文者雖釋老亦謂之碑而可也柳宗元南嶽大明寺律和尚碑陰曰凡葬大浮圖無窳穴其於用碑不宜然昔之公室禮得用碑以葬其子孫因宜不去遂銘德行用圖久於世及秦刻山石號其功德亦謂之碑而其用遂行然則

雖浮圖亦宜也柳州說是也

宋景文筆記云碑者施于墓則下棺施于廟則繫牲
古人因刻文其上今佛氏揭大石鏤文士大夫皆題
曰碑銘何耶案儀禮碑在堂下三分庭之一當碑揖
宗廟路寢庠序皆有碑所以識日景是不特繫牲而
用也碑于釋氏無礙名義如王簡栖頭陀寺碑文其
來已久矣

恒夫按唐文粹載劉禹錫撰牛頭山第一祖融太
師新塔記題書塔記一例也唐等慈寺塔記銘金石
萃編題書記銘又一例也潘尊師碣文黃老亦題
載

曰碣

附題主式

朱子家禮曰伊川神主式作主用栗取法於時日月
辰跌方四寸象歲之四時高尺有二寸象十二月身
博三十分象月之日厚十二分象日之辰身跌皆厚
刻上五分為圓首寸之下勒前為領而判之一居前
二居後前四分後八分陷中以書爵姓名行曰宋故某官某
幾神主陷中長合之植於跌身去跌上一尺二寸竅
六寸濶一寸其旁以通中如身厚三之一謂圓徑居二分之一謂
七寸二分粉塗其前以書屬稱屬謂高曾祖考稱謂官
分之上或號行號如處士秀才

行如幾郎幾公旁題主祀之名曰孝子其奉祀加贈易世則筆滌而

更之水以灑外改中不改

朱子語類曰又無爵曰府君夫人漢人碑已有只是尊神之辭府君如官府之君或謂之明府今人亦謂父為家府君

呂坤四禮疑曰府君孺人爵也生為庶人死而爵之可乎誣也僭也孝子不誣親聖人不誣僭○家禮有家之禮非家家之禮也生而有爵死而稱於廟不沒其實也爵不一等舉府君孺人例其餘爾庶人止宜稱顯考某字行幾顯妣某氏行幾神主為是何必竊

名器以自重哉又案伊川製主式士庶不用益知府君孺人非士庶之通稱也

姚翼家規通俗編曰案朱鹵菴題無官神主稱處士鄭介菴作無封婦人誌稱碩人處士非嚴光徐穉之流本不易稱但舍此無以順孝子之心碩人既可稱於誌則主亦可稱也故皆從之○案黃暉蓬窻類記曰今無官者稱府君蓋襲古式而不知本朝有禁然禁無可考而嘗於載籍中見湛甘泉先生告祖文稱曾祖處士府君此公非不知禮不考典故者仁文莊公乃本朝達禮之士其輯家禮亦稱處士府君恐蓬

窻類記所言訛也詩楚茨先祖是皇朱注皇大也君也而慶源輔氏曰君即是府君之謂則府君乃人子尊祖考之辭非以爵稱也明矣第卑幼於主人者則不可槩稱爾
舜水談綺曰凡有官爵者皆書之婦人一品曰一品夫人二品曰夫人三品曰淑人四品曰恭人五品曰宜人六品曰安人七品曰孺人八品九品散官共用孺人庶人妻曰媪或嫗女曰姑或姐粉面屬稱有官爵者曰顯考顯妣士庶人曰先考先妣男在官考曰府君不仕者曰處士無官無學者曰郎

寅按祭法曰天子五廟曰考廟王考廟皇考廟顯考廟祖考廟是以皇考爲曾祖以顯考爲高祖范育呂和墓表稱曾祖爲皇考祖爲王考者據此也曲禮曰祭王父曰皇祖考王母曰皇祖妣父曰皇考母曰皇妣夫曰皇辟屈原離騷臣皇考曰伯庸是以皇考爲父漢議宣帝父稱魏相以爲宜稱尊曰皇考晉司馬機爲燕王告禰廟文稱敢昭告于皇考清惠亭侯者據此也皇大也美也古人於祖考及妣之上皆加皇字後世天子稱皇故元大德年間始詔改皇爲顯而後相沿不復用皇字

恒夫按古未葬之前有重既虞之後有主許慎鄭
玄謂天子諸侯有主卿大夫無主大夫東帛依神
士結茅爲菹徐邈清河王懌之徒駁之然自晉以
後士大夫因許鄭之說多不立主或爲神帛安昌
公荀氏始有祠板而溫公因之至程子創爲木主
定式朱子家禮因之然程子猶禁士庶用之而家
禮題主式有顯考處士府君神主是處士亦用神
主也又語類曰伊川主式雖殺諸侯之制然未見
諸侯之制如何若以爲疑則用牌子可也呂坤四
禮疑曰主之式題考妣姓字以依神俾子孫祭之

爲如在爾庶人之家久則木牌暫則紙位但存尊
祖敬宗之心不必拘泥韜藉之說敖英東郭贅言
曰古人祠堂或祀木主或祀小影程伊川朱晦菴
而以主司馬溫公呂東萊以影蓋主者神之棲也影
不者神之像也我朝劉文安公不用主不用影止用
一軸太書三代考妣之靈此又一見也據已上說
不可必拘拘于其製式也

附
謚

通典曰大唐之制太常博士掌凡王公以下擬謚皆
跡其功德而爲之褒貶

諸謚執事官三品以上散官
佐使錄行狀申考功勘校下

太常擬謚號申省沈約謚法云晉太興三年始詔無爵者謚皆稱無爵稱子議定然後奏聞

子養德丘園聲實明著則謚曰先生大行則大名小

行則小名舊有周書謚法大戴禮謚法又漢劉熙謚法一卷晉張靖撰謚法兩卷又有廣謚一卷沈約總集謚法凡一百六十五種

鄭樵通志序論曰謚之善惡可即一文以見義一文

不得而盡者即複文以見義複文不足以盡者又從

而加之如衛之公孫枝是為惠貞文子亦古之道何

必為之說以釋之乎

李豫亨推蓬寤語曰唐制謚議之法無爵者稱子若

蘊德丘園聲實明著雖無官爵亦奏聞賜謚曰先生

今三品以上乃得謚號而無爵之謚遂絕予以為純

白之士雖不得出仕者仁朋義友孝子順孫循其行

實私為謚義無不可

讀禮通考曰列女傳柳下惠死門人將謚之妻曰夫

子之謚宜為惠乎門人從以為謚魯黔婁先生死曾

子與門人往弔焉曰何以為謚其妻曰以康為謚昔

先君嘗賜之粟三十鍾先生辭而不受是其餘富也

君嘗欲授之以國相先生辭而弗為是其餘貴也彼

先生者甘受天下之澹味安天下之卑位不戚戚於

貧賤不急急於富貴求仁而得仁求義而得義其謚

十四

十四

十四

十四

十四

十四

十四

十四

十四

爲康不亦宜乎乾學按上二條乃私謚之始
大寅按郊特牲云古者生無爵死無謚曲禮云已孤
暴貴不爲父作謚先儒據此多疑私謚之僭然謚
者所以稱德也有德然後有爵故有爵則有謚也
是故苟有德之可稱則雖無爵者亦謚無不可也
是乃私謚之所以作也

恒夫按命謚古人必取之周公謚法然謚法之義
不可信鄭樵通志辨之盡矣今雖謚法中所不見
而名實相當則何不可之有本邦今俗喪祭皆依
今浮屠之法其死也彼命所謂法號者以易生時之

名而不論其行實妄作不知何義是與古之謚似
而非者也然貴賤通用不能免俗則其有德業者
別作謚而可又按左氏隱八年傳云諸侯以字爲
謚據此古有以字爲謚者今之士或有嫌私謚則
以字爲謚或以生時之號爲謚亦可也
白虎通德論曰夫人無謚者何無爵故無謚或曰夫
人有謚夫人一國之母修閨門之內群下亦化之故
設謚以彰其善惡春秋傳曰葬宋恭姬傳曰其稱謚
何賢也傳曰哀姜者何莊公夫人也卿太夫妻無謚
何賤也八妾所以無謚何卑賤無所能務猶士卑小

不得有謚也太子夫人無謚何本婦人隨夫太子無謚其夫人不得有謚也天子太子元士也士無謚知太子亦無謚也

恒夫按東周共太子晉共太子陳悼太子之類不一而止則所謂太子無謚者未之考也顧夢麟中菴瑣錄曰案婦人以隨從爲義故得蒙夫之謚晉胡訥云禮婦人生以夫爵死以夫謚春秋有謚不復依禮故釋例云繫夫謚者夫人而已衆妾不合繫夫其聲子載媯有謚者皆越禮妄作也王彪之亦云婦人有謚禮壞故爾晉書賈充妻別謚宣不從

夫謚又虞譚母謚定桓溫母謚敬南史駱文牙母謚恭此婦人有謚之見諸史傳者也雖賢忒不同要非禮之正矣

凡寅按婦人無謚當爲正典然有賢行顯於世者則不特謚之亦何不可猶處士有賢行者賜謚或私謚也蘇老泉云婦人有謚自周景王之穆后

序例

墓銘舉例曰凡墓誌銘書法有例其大要十有三事焉曰諱曰字曰姓氏曰鄉邑曰族出曰行治曰履歷曰卒日曰壽年曰妻曰子曰葬日曰葬地其序如此

如韓文集賢校理石君墓誌銘是也其曰姓氏曰鄉
邑曰族出曰諱曰字曰行治曰履歷曰卒曰壽年
曰葬曰葬地曰妻曰子其序如此如韓文故中散
大夫河南尹杜君墓誌銘是也其他雖序次或有先
後要不越此十餘事而已此正例也其有例所有而
不書例所無而書之者又其變例各以其故也
凡誌之所畧者以非所重也如書諱而不書字書卒
而不書日書葬而不書地之類又一例也

金石要例曰元潘蒼崖有金石例大段以昌黎爲例
顧未嘗著爲例之義與壞例之始亦有不必要例而例

之者如上代兄弟宗族姻黨有書有不書不過以著
名不著名初無定例乃一一以例言之

墓誌舉例曰唐故昭武校尉守左金吾衛將軍李公
墓誌銘不書姓宗室也凡不書姓宗室也名門也鉅
族也貴戚也顯家也五者人所習聞而易知也五者
之外又有已見于題而不書者蓋題實文之綱文固
題之目綱既舉之在目有可畧之理此又不書姓之
通例也然畧其姓者其族出多詳焉

寅按此外唐故秘書少監獨孤府君故河南令張
君號州司戶韓府君故朝散大夫商州刺史董府

君故檢校尚書劉公殿中少監馬君處士盧君故
江南西道觀察使太原王公故朝散大夫庫部郎
中鄭君崔評事柳子厚墓誌銘不書姓亦在此例
號州司戶韓府君墓誌銘諱而不字畧也
寅按考功員外盧君墓銘殿中少監馬君施先生
襄陽盧丞試大理評事王君故大學博士李君故
河南府王屋縣尉畢君墓誌銘登封縣盧殷墓誌
亦不書字
息國夫人墓誌銘不書諱婦人重在姓故畧之也
寅按楚國夫人扶風郡夫人亦同不書不

金石要例曰碑志之作當直書其名字而東漢諸銘
載其先代多只書官唐宋名人文集所志往往只稱
君諱某字某使其後至於無考為可惜

恒夫按隸釋趙相雍闕碑題漢故趙國相雍府君
主之闕十隸字今在梓潼漢代銘墓所叙人之上世
未嘗書其名諱此碑載雍君父祖諸兄名又有字
其官秩甚詳而雍君事迹甚略趙氏以此為碑而
謂前十字為闕予考其文水闕舊墓謂九江君也
右校既易地造壟此之諸冢皆同兆域趙相故吏
并志其事蓋題闕之文非墓道之碑與丘中之銘

也據此漢人之叙上世亦有書其名字者
 蔡邕祖攜碑云攜字叔業曾祖父勳攜生稜稜生邕
 邕至勳連身六世故後漢蔡邕傳稱勳為六世祖而
 唐穆員為其父誌高祖上一世則稱五代祖陳子昂
 志父墓五世祖太樂生高祖方慶生曾祖湯湯
 生祖通通生皇考辯柳州父神道表六代祖慶五代
 祖且高祖楷蘇子美父誌亦然此當從後
 金石例曰不特書其父而書大王父王父伯例大王
 父玄暎歷御史屬三院止尚書郎生景肅守三郡終
 傳涼王生政襄鄧等州防禦使鄂州採訪使贈吏部

尚書公尚書之弟某子

江南西道觀察使太原王公神道碑

墓銘舉例曰故貝州司法參軍李君墓銘右誌遠書
 世系而不書父

寅按蔡邕郭有道碑遠書世系而不書父母陳太
 丘碑不書世系及父母韓愈李元賓墓誌登封縣
 尉盧殷墓誌皆不書父母柳宗元故連州員外司
 馬凌君權厝誌覃季子墓銘亦不書父母又李文
 公贈散騎常侍獨孤公墓誌書父謚不書諱
 又按歐陽修尹師魯墓誌銘曰余與師魯兄弟交
 嘗銘其父之墓矣故不復次其世家焉蓋此例多

有晉孫綽太宰郝鑿碑文曰公益黃帝之苗裔氏族所由皆紀於祖御史之碑矣

柳河東叔妣吳郡陸氏夫人誌文不書其夫之諱蓋已表其墓而書之矣故誌末云恭惟仲父之諱與夫人之爵齒備于版文今不書懼再告也然韓文誌婦人亦皆不書其夫之諱則又其通例也

金石要例曰女子重所歸故壻多書子婦例不書楊炯為曹通神道碑載子婦一人以其陪窆于塋內也裴抗為田承嗣神道碑載子婦二人以其為公主也而宋之黃裳誌夫人黃氏男三長曰淳娶孫氏次曰

昱娶楊氏少曰延娶張氏楊慈湖誌舒元質云生子五人曰鉞叔晦壻曰鉦娶袁氏曰銑簡女簡焉曰錯娶趙氏曰鑣叔和之壻也方太琮誌其父云太輿娶溫陵趙奉直不劬之女大琫娶福唐林簡肅栗之孫女大鏞娶薛左史元昇之孫女誌林景誥云男榮公聘王氏誌徐母趙氏云子庭蘭娶俞料院某之孫女此外諸家文集亦不多見至元而古法蕩然閭復廣平王碑元明善淇陽王碑無不書子婦矣墓銘舉例曰崔評事墓誌銘書子而不書名亦畧也誌中多有之而不舉者不足以為例也

金石例曰書異母子女例始娶范陽盧氏女生仁本
 仁約仁載皆有文行二季舉進士皆早死仁本為後
 子獨存後娶趙郡李氏生三女二夫人凡三男五女
河東節度鄭公神道碑 初娶吏部侍郎京兆韋肇女生二女一
 男長女嫁京兆韋詞次嫁蘭陵蕭儻後娶河內少尹
 趙郡李則女生一女二男其餘男二人女四人皆幼
 嗣子退思韋氏出也朝散大夫尚書庫部郎中鄭君誌 公有四子長
 曰元孫三原尉次曰元質彭之濛陽尉曰元立興平
 尉曰元本河南參軍皆愿敏好善元立元本皆崔氏
 出鳳翔隴州節度使李公誌

寅按韓文子女不書其出例朝散大夫贈司勳員
 外郎孔君墓誌曰君娶弘農楊氏卒又娶其舅宋
 州刺史京兆韋妃女皆有婦道凡生一男四女皆
 夫幼前夫人從葬舅姑兆次登封縣尉盧殷墓誌曰
 君始娶滎陽鄭氏後娶隴西李氏生男輒死卒無
 子女一人入李九下長晉父無主不
 金石要例曰子女皆統于父雖異母而不分書所出
 在唐如權德輿誌李巽三夫人四子不言某屬某氏
 楊綰作郭汾陽夫人神道碑六子八女俱在夫人下
 在宋歐公誌蘇子美先娶鄭氏後娶杜氏三子誌梅

舜俞初娶謝氏再娶刁氏子男五人女二人温公誌
呂獻可始娶張氏後娶時氏四子六女荊公志葛源
元配孫氏繼配盧氏三子一女誌蘇安世娶葉氏又
娶某氏子四人女子五人誌李宗辯男十五人女十
九人俱書夫人季氏下是皆以父為主不必分屬之
母此定例也然婦無別志即附見夫志之內者前後
夫人不妨分屬子女如昌黎碑楊燕奇夫人李氏有
男四人女二人後夫人雍氏有男一人女二人志昭
武李公三娶元配韋氏生子紘女貢次配崔氏生綽
紹綰今夫人無子白樂天之志元微之穆員之志鄭

叔則皆用此例迨元姚牧菴碑姚樞書子女某出某
出虞伯生志牟應龍亦書某出張起岩狀張宏夫人
趙氏姜氏二子元節趙出元里姜出此非古法之所
有也

婢妾所生之子書其子不書其母如昌黎志李邢云
夫人博陵崔氏七男三女邠爲澄城主簿其嫡激鄜
城令放芮城尉漢監察御史滄洸潘皆進士是崔氏
所生只激一人其六人皆不書其母誌李惟簡云夫
人崔氏公有四子長曰元孫次曰元質元立元本元
立元本皆崔氏出其二子皆不書其母誌鄭君云初

卷下
娶韋肇女生二女一男後娶李則女生一女二男其餘男二人女四人其餘者蓋婢妾所生故不書其母李定母仇氏王文公爲李間誌書定于正室浩氏之下不書仇氏古例皆然至元而壞之劉敏中忠獻碑書妾李謙爲張文謙神道碑書側室姚牧菴阿力海涯碑書如夫人潘澤碑子希永他室李出蘇天爵高文貞碑銘子男三人履恒麻夫人出益側室王氏出耶律有尚碑子男五人長楷次樸次權皆伯德夫人出也次括次檢庶也宋景濂方愚菴墓版文稱妾爲少房

少恐小訛

墓銘舉例曰息國夫人墓誌銘書其夫男女七人而惟叙夫人所生之男女詳嫡而畧庶又一例也金石要例曰婦人之誌非其所生不書臨川誌曾占子男六人畢鞏牟宰布肇女九人其志夫人吳氏子男三鞏牟宰女一
周隋碑志多不書子姓并不書配其時夫婦各自爲志故不書至于合葬者夫人必書如庾子山之段永司馬裔柳霞侯莫陳道生宇文顯和諸碑是也後來歐陽爲石守道志不書妻某氏子某名尹師魯亦不書子名有書子不書妻周隋間多有之至唐如孫逖

志李嵩獨孤及志姚子彥皆然
墓銘舉例曰柳河東故秘書郎姜君墓誌不書妻而
書子某母曰雷姬此墓誌中書妾媵例又正例之再
變也
金石要例曰周隋之碑單書嗣子未嘗人人而書也
觀庾子山諸碑司馬裔但書世子侃長孫儉但書墩
等兄弟紇千宏但書世子恭等崔詵但書世子洪度
辛威但書世子永達段永但書世子笈唐權文公為
伊慎神道碑但書冢嗣餘書息男十六人
昌黎碑誌只書子女更無書孫者孫逖為杜義寬碑

書孫以表其墓權文公為王端碑書孫以其葬王父
白樂天碑崔字書孫以其求父張曲江為呂處真書
其孫女為李仁瞻書其孫李迴秀為裴希惇書其孫
皆以立碑故其他皆不書也至宋則皆書孫矣不特
孫也且及于曾孫矣廬陵蘇明允誌書孫曾子固誌
錢純老書孫東坡狀溫公書孫子固誌沈率府子三
人某某孫八人某某曾孫三人某某東坡范蜀公誌
書曾孫女虞伯生碑張宏範書孫六人某官某曾孫
十一人某官某
金石例曰書子女及外孫例七男三女邠為澄城主

簿其嫡激鄜城令放芮城尉漢監察御史漼沈潘皆
進士及公之存內外孫十有五人中大夫陝府左
司馬李公誌
金石要例曰書孫壻例葉水心臧氏誌書孫壻虞伯
生狀董文用孫女十人長適某次適某某馬石田銘
劉百戶孫女四人一適某一適某唐時孫壻不敢入
碑志或列之碑陰與先友一例權文公之碑王光謙
是也立碑於其出書不書也至宋明書壻夫不
謂姊妹之子爲出公羊傳曰益舅出以鄩世子巫與
魯襄公俱是宮外孫同所自出故凡言出者因母姓

而云也今以出屬之于父不通甚矣且父在則孫俱
屬之父子不私爲一己之有也
女之所適但書壻之姓氏不當及壻之祖父也元明
善誌袁夫人史氏書女長適宋相史莊肅公萬之之
孫似伯次適工部尚書余天任之孫昌期次適宋資
政殿大學士史岩之之孫益伯以顯官著名故變例
書之蘇天爵志袁文清女四人其二人書適故觀文
殿大學士趙某孫由錫適故相史忠定王玄孫公佾
其二人書適同知袁州路總管府事趙孟貫適處州
儒學錄余應桀二書祖父二不書者以著名不著名

也然已為濫惡今世不論馬醫夏畦一概書某某之
 子若孫某不知何謂也
 書妻變例張景妻唐氏再適宋祁載之
 韓文公三女其長女初適李漢改適樊宗懿誌書婿
 左拾遺李漢聳集賢校理樊宗懿次女許嫁陳氏三
 女未笄聳即婿之別名此皇甫持正變例也
 凡書生卒止書某年某月某日不書某時
 金石例曰書死不書年月日例年若干而終在官舉
 其職考功員外年七十三以其官終興元少尹以疾
 卒官年五十九清河郡公公在相位三年其後以吏
 房公誌

部尚書授節鎮山南年六十以薨故相權年二十九

客南海未幾竟死年五十三監察御史

寅按此外唐故河南令張君墓誌銘殿中少監馬
 君墓誌故幽州節度判官贈給事中清河張公故

貝州司法參軍李君四門博士周況妻韓氏南陽
 樊紹述韓滂墓誌銘曹成王碑卒不書年月日襄

陽盧丞扶風郡夫人墓誌銘書年而不書月日又
 墓銘舉例李文公故河南府司錄參軍盧君墓誌

銘書卒日而不書年柳河東東明張先生墓誌書
 卒之歲月而不日

墓銘舉例曰韓文公故貝州司法參軍李君墓誌銘
不書壽年柳河東東明張先生墓誌不書壽年

金石例曰葬不書年月日例即葬于其地烏氏先廟碑

寅按此外殿中少監馬君施先生唐故虞部員外
郎張府君扶風郡夫人四門博士周況妻韓氏墓
誌銘清河郡公房公墓碣銘李元賓墓誌曹成王
碑不書葬日

又曰不書葬地例樊紹述既卒且葬南陽樊紹述誌

寅按此外殿中少監馬君墓誌銘清河郡公房公
墓碣銘扶風郡夫人墓誌銘不書葬地

金石要例曰今之為塔銘者于其終也書僧臘若干
世壽若干因話錄云釋氏結夏隨其身之輕重以蠟
為其人解夏之後以本身驗于蠟人輕則為妄想耗
其氣血矣今作伏臘之臘失其義柳州書為僧凡若
千年其壽若干或凡年若干為僧若干期

附行狀

金石例曰行狀惟韓退之狀董公如式

續禮通考曰乾學按朱子嫌昌黎董晉行狀稍長然
朱子作張魏公行狀多至二卷蓋行狀不妨詳言之
亦視其人爾長短不可限也

金石要例曰行狀為議謚而作與求志而作者其體
稍異為謚者須將謚法配之可不書婚娶子姓昌黎
晉亦書柳州狀段太尉狀柳渾是也為求文者昌黎
子姓之狀馬韓柳州之狀陳京白香山之狀祖父是也
王魯齋曰衛公叔文子卒其子請謚于君曰日月有
時將葬矣請所以易其名者請謚之詞意者今世行
狀之始也自唐以來有官不應謚亦為行狀者將求
名世之士為之誌銘而行狀之本意始反矣觀昌黎
廬陵東坡集銘人之墓最多而行狀不過五篇而婦
人不為也又知婦人之不為行狀之意亦明矣按江

淹為宋建太妃周氏行狀任昉裴野皆有婦人行狀
非婦人不為行狀也

歐陽玄銘曾秀才云行述似翁所作索求魯翀作姚
天樞神道碑云其子侃以公行實徵錄歐陽發作事
迹此皆與行狀名異而實同也今既有行實又有行
狀無乃重出乎

今人為其父行狀稱父之父為王父王父之父稱為
曾王父曾王父之父稱為高王父非也稱謂當以父
為主故穆員狀父云高祖宏遠曾祖固禮祖思恭考
元休未嘗以員之自稱易之孫逖父銘陳子昂父志

皆如之
銘例
文體明辨曰若夫銘之爲體則有三言四言七言雜
言散文有中用兮字者有末用兮字者有末用也字
者其用韻有一句用韻者有兩句用韻者有三句用
韻者有前用韻而未無韻者有前無韻而未用韻者
有篇中既用韻而章內又各自用韻者有隔句用韻
者有韻在語詞上者有一字隔句重用自爲韻者有
全不用韻者其更韻有兩句一更者有四句一更者
有數句一更者有全篇不更者

墓銘舉例曰銘亦不必皆詩文即銘焉耳
金石要例曰墓誌而無銘者蓋叙事即銘也昌黎張
圓之誌云叙次其族世名字事始終而銘曰云云蓋
所謂誌銘者通一篇而言之非以叙事屬志韻語屬
銘猶如作賦者未有重曰亂曰總之是賦不可重是
重亂是亂也故無銘者猶賦之無重無亂者也正考
甫之鼎銘云一命而僂再命而偃三命而俯循牆而
走亦莫敢余侮鱣于是粥于是以餬余口比干銅盤
曰右林左泉後岡前道萬世之寧茲焉是保漢滕公
石銘曰佳城鬱鬱三千年見白日吁嗟滕公居此室

此有韻之銘也季札之喪孔子銘其墓曰嗚呼有吳
延陵季子之墓衛孔悝鼎銘曰六月丁亥公假于太
廟公曰叔舅乃祖莊叔左右成公成公乃命莊叔隨
難于漢陽即宮于宗周奔走無射啟右獻公獻公乃
命成叔纂乃祖服乃考文叔興舊者欲作率慶士躬
恤衛國其勤公家夙夜不懈民咸曰休哉公曰叔舅
予女銘若纂乃考服悝拜稽首曰對揚以辟之勤大
命施于烝彝鼎此無韻之銘也古來原有此兩樣墓
表神道表俱有銘有不銘
墓銘舉例曰施先生墓誌銘前既書韓某爲之辭曰

云云後又書系曰云云則所謂辭者誌也所謂系者
銘也不曰銘而曰系又一例也

金石要例曰楊炯爲成知禮神道碑其碑銘之後有
系曰若楚詞別自一體

叙事即在韻語中昌黎房使君鄭夫人殯表大理評
事胡君墓銘盧渾墓誌銘

凌約言曰近世製碑序終申以銘猶太雄氏演法義
終宣以偈多是隳括上文不免牀上疊牀之病獨韓
柳作銘超然以他語發揮之不襲常格

見昌黎集李元賓墓誌注

銜例

昌黎集李元賓墓誌注曰石刻首題云韓愈撰段季
展書其後題云十一年十二月建立南海神廟碑注
曰石刻其首云使持節袁州刺史韓愈撰使持節循
州諸軍事守循州刺史陳善書并篆額其後云元和
十五年十月一日建平陽路公神道碑銘注曰按石
本其首云朝議郎守國子博士上騎都尉韓愈撰銀
青光錄大夫守吏部尚書上柱國滎陽縣開國侯鄭
餘慶書將仕郎右拾遺內供奉賜緋魚袋陳岵篆額
其後云元和七年歲次壬辰十月丙子朔十五日庚
寅建柳州羅池廟碑注曰碑刻本首云尚書吏部侍

郎賜紫金魚袋韓愈撰中書舍人史館修撰賜紫金
魚袋沈傳師書其後云朝議郎桂管觀察使試太常
寺協律郎上柱國陳曾篆額長慶元年正月十一日
桂管都防禦先鋒兵馬使朝散大夫試左衛長史孫
季雄建立

寅按撰書等人名列銘後或碑首或分列其首尾
無有定式

恒夫按千佛樓碑首云李憚奉勅撰其後云廣運
二年八月庚子劉守清書王廷譽篆額

引宋以前碑誌
多萃編所載

見金石萃
編此下所

佩文齋書畫譜曰崇壽寺碑吏部右侍郎溫仁和撰
文武定侯郭勛篆額郭勛郭英五世孫明正德三年嗣武定侯進封翊國公
寅按凡列撰書等人名首撰次書次額次刻字人
而不以其官爵之尊卑也

恒夫按郭氏家廟碑云御題額顏真卿撰并書此
代宗題額故撰者列下又改建題名碑云吳聽書
丹盧元撰額此撰者列書者後又太原王公碑云
哀孫顏撰袁滋篆額韋縱書吳公新阡碑云徐時
行著王穀祥篆甥沈庭訓謹書吳應鐫文衡山墓
誌銘云黃佐撰王穀祥填諱并篆蓋不肖男彭泣

東血寫此書者列篆者後皆變例也
錢希言戲瑕曰近世凡墓誌銘及碑碣之類必加書
撰人并篆蓋題額者於前至往往假顯者之名以誇
於人此甚可笑歐陽公與尹材帖云墓銘刻石不必
留官銜題目及撰人書人刻字人姓名晉人以前皆
不著撰人姓名此古人有深意況久遠自知歐公此
言豈無所見而云邪予觀古之碑志有止書撰人姓
名而不著書人者蓋以當時之人皆能書或多撰者
之所書也有止著書人姓名而不著撰人者蓋文或
書者之所為也有止書某官某人於旁而不著書撰

者蓋書撰或即其人也予近得唐人二志石其一開元二十八年周府君志其一太和二年顧府君志皆不著書撰人名可見在唐猶然而不特晉以前也又嘗於城南草間得宋時墓石一方乃子誌父其諱處字皆略草與誌文之字不倫後書曰某人書諱字亦知之乃知諱爲其人親書此又可見古人作事之不苟矣

都穆聽兩記談亦有此說

恒夫按徐浩碑張式撰次子峴書并篆額表姪張平叔題諱則填諱唐時已有之

東坡集答寶月大師書曰其碑不用花草欄界只鐫

書字一味已有大字額向下小字但直寫文詞更不須寫大藏經碑一行及撰人寫人姓名卽古雅不俗與大覺禪師書曰碑上更不寫題自古制如此最後方寫年月撰人銜位更不用著立石人及存任人名銜此乃近世俗氣不典也

陳奕禧金石遺文錄曰鄘閣頌列書撰人名氏此漢碑之創見也有列撰而不列書者石勛撰費鳳碑邊詔撰老子銘是也列書而不列撰者郭香察書華山碑紀伯允書武斑碑是也

恒夫按李翁鄘閣頌建寧五年

月十八日從

吏位方為方此頌故吏下辨仇佛子長書此頌石師南方威明費鳳碑石勛字子才云

之老子銘邊韶典國之禮材薄思淺不能測度演而銘之二碑著撰人名在碑文中西嶽華山廟碑

遣書佐新豐郭香察書刻者穎川邯鄲公脩蘇張工方武班碑紀伯允書此碑武班碑後漢質

帝建和元年立書人名創見于此郭昌宗金石史曰漢華山碑新豐郭香察書郭姓香名察書監書也一云香察名

周亮工因樹屋書影曰唐碑制度極多有一人製序一人製銘者故尹師魯志張堯夫墓序而歐陽修為

之銘嘗考張說文集所為上官昭容銘其序則蘇頲作也此可以證

恒夫按唐宗聖觀記歐陽詢撰序并書陳叔達撰銘蘇壞碑張說撰銘虞藏撰序并書周尉遲迴廟

碑方伯方叙顏真卿銘元元靈應頌載璇撰序劉同昇撰頌

又按撰或曰製頭陀寺碑王巾製木潤魏夫人祠碑銘并序路敬淳製裴鏡民碑李

百藥曰文韓仲良銘于志寧文王仁求碑閻丘均文游濟瀆記達奚珣文曰詞濟瀆序達曰纂開業寺碑李尚一纂北曰記寧遠記曰述真空寺經幢張摸述三曰識明鹿川勞君墓

識於墓 **曰作** 華岳廟詩 **曰著** 吳公新阡碑 **曰撰文**

上虞 **曰作** 碑賈竦作 **曰著** 徐時行著 **曰撰文**

隋姚辯墓誌銘 虞世基撰 文崇壽寺碑 溫 **曰製文**

仁和撰 文代國長公主碑 鄭萬鈞撰 文 **曰製文**

契苾明碑 婁 **曰制文** 王師德造像記 **曰為文** 杏冥

師德製文 **曰制文** 淳于敬一制文 **曰為文** 君銘

薛稷為文 滕頌人 **曰纂文** 漢紀信碑 盧藏用纂文

墓誌銘 賀甫為文 **曰纂文** 三公碑 梁昇卿纂文

曰為此頌 郗閔 **曰造此文** 後周華岳碑 將軍 **曰作**

此文 蓋文達碑于志寧 **書或曰書丹** 隋姚辯墓誌

丹鄭康成碑 安中書丹 **曰敬寫** 進法師塔銘 沙 **曰**

改建題名碑 吳聽書丹 **曰敬寫** 門智詳敬寫 **曰**

自書 王仁求碑 王 **曰追書** 御史臺精舍碑 **曰下丹**

文宣王廟碑 裴平下丹 王昶 **曰書石** 朝陽巖銘 後

曰以書丹為下丹 始見此 **曰書石** 學田山玉書

石夏公墓誌銘 **曰書此碑** 武斑 **曰書此頌** 郗閔 **曰**

程應魁書石 **曰書此碑** 武斑 **曰書此頌** 郗閔 **曰**

書人 三教道場文 **曰書銘人** 馮善廓浮圖銘 書 **撰**

并書或曰兼書 裴道安墓誌 族叔肅撰 兼書 **或曰**

及書 功德記 郭謙 顏真卿東方朔畫贊 撰并書 及

題額 福田寺記 李少鴻書 并篆兼鐫文 宣王廟記

裴平下丹篆額 重修蜀先生廟碑 王庭筠撰書 篆

又王訓墓誌銘 并序 王惠撰并書 并序 并書 皆小

字旁書 尉遲迴廟碑 蔡有隣書 并陰 金石萃編 引

曰碑陰為迴族孫士良述 張嘉祐德政之

美意感其立廟為著于碑耳亦蔡有隣書

金石例 **曰書碑額例真字八分書謂之題額篆字則**

云篆額

恒夫 按篆額題額或曰篆或曰額 例見前 曰題篆 恒山

安天王銘載千 曰書碑額 孔子廟堂記相 例非一 齡書并題篆

也又周密癸辛雜識曰趙松雪云北方多唐以前

古冢所謂墓誌者皆在墓中正方而上有益益豐

下殺上上書某朝某官某人墓誌此所謂書益者

後人立碑於墓道之上篆額止謂之額後訛為益

非也 田帝

又按其子孫撰書或立石者子稱曰孝子孝男孫

曰孝孫子或單稱曰男 代國長公主 或曰不肖男

文衡山 或曰不肖孤 宋趙府君阡表 或曰嗣子 李氏

墓誌銘 或曰不肖孤 不肖孤孟頫述

栖先塋記 嗣 或曰孤子息 契苾明碑先天元年十月十六日孤子息涼

國公萬 孫或曰哀孫 太原王 次子則見徐浩碑撰

書字上書曰謹曰敬曰泣血曰泣血誓額 例見前 或

不書無定例門人或稱門生 馮先生墓表門生王錫爵頓首拜謹撰

又按書諱字或曰填諱或曰題諱徐浩碑書人次

題諱鹿川勞君墓誌銘 王世貞填諱 文衡山墓誌

銘填諱次書人要無定例也 黃姬水書

又按南昫先生 彭定 文錄生壙志男正乾謹填卒

葬年月 古

又按立石曰立曰建曰樹曰豎且其年月日書在

撰書人名前後無定例如左

後周華岳碑大周天和三年歲在丁亥十月戊辰

朔十日立將軍萬紐于瑾造此文車騎將軍趙文

淵字德本奉勅書

此書其字與費鳳碑及蓋文達碑例同

裴鏡民碑貞觀十一年十月廿一日樹碑李百藥

製殷令名書

鄭康成碑史承節撰安中書丹綦畚篆額大金

承安五年勒成紫淵立石千金刊字

丁思禮豎心經碑大曆八載七月廿一日豎

王師德造像記淳于敬一制文大德永徽元年建

造

又按立石非一人之力者重修濟瀆廟記至大五

年六月十五日在瑞等立石

近世有書曰門人等立者等字不妥等者

謂有其類也書曰門人某某等立或書曰門弟子立則可

又按有勒書人集聖教序太宗文皇帝製沙門懷

仁集晉右軍王羲之書于志寧等奉勅潤色咸亨

三年京城法侶建立諸葛神力勒石朱靜藏鐫昇

仙太子碑御製御書題御製及建辰并梁王三思

已下名薛稷書題諸王等名鍾紹京書鍾紹京奉

勅勒御書李元王勒御書韓神感刻御字朱羅門

刻御字張延掌碑馬瞻刻字并摸勒張彥達妻碩
夫人墓誌銘吳寬撰玄孫獻翼重勒黃姬水書

此勒

書次書人亦變例也

又按書刻字人自漢碑而然郝閣頌

石師南 威明 西

嶽華山廟碑

刻者潁川邯鄲公脩蘇張工

可證曰刻曰刊曰

鐫已見前或曰鐫字人

八關齋碑鐫字人石從建

或曰石匠 車修

濟瀆廟記石匠桑吉

總要

寅按李潛菴說誌石一墓碑一碑記一神道碑一
凡用石四枚蓋誌石納之壙中墓碑表其墓其有

功德者別立碑記神道碑又表其墓所在然唐宋
之制神道碑皆有文詞即是碑記墓之東南為神
道碑立其地故曰神道碑又徵之於古東西南北
從其便無有定所也螭首龜趺謂之碑圓首方趺
謂之碣碣亦或曰碑又謂墓表其詳見前大抵歷
代制度有損益學者須斟酌其宜焉

恒夫

按家禮注立小碑刻姓名於其面而述世系

行實於陰側然隋唐以來孝義著聞雖不仕亦立
碣則有功德者有官無官皆立碑記其高廣又有
差等歷代制度不同明制碑身五尺五寸以至九

尺而貴得同賤也

見家禮注

或其文辭之多四面皆書

亦無不可

又按本邦上古墓有封樹而未聞有碑誌及中世

有之誌即用金牌若銅牌者是也碑亦猶有存

貞藤

幹所著山陵圖志附載

元明天皇推山陵碑身長二尺濶二尺餘厚一

尺有刻字按國史養老五年十月庚寅

太上天皇遺詔曰葬地植常春之樹立刻字之碑

凡諸陵無有碑而推山陵特立此碑者以有遺詔

也西田直養所著金石年表天平勝寶三年有竹

野王墓碑後人多做緇徒代碑以塔於是碑幾廢至

近代則復立碑表而長短未有定限天保二年辛

卯有令庶人墓表并跌高不得過四尺

墓碑考卷下終

金城米谷先生龍父執也情好親密誼如兄弟先人
使龍事以叔父禮先人歿後嚴訓慈誨無所不至龍
之不墜先業得以至今日者實先生之賜也先生短
軀方面隆鼻甚口而音吐朗快言談風生喜論歷史
且辯當世之事務先人嘗謂龍曰子虎有才畧若使
之出乎龜正之間而得其所遇則當任帷幄其所建
議必有大可觀者矣先生務於實用而畧於文辭故
其所著多不入時好此書亦其一也雖然其考證的
確便于學者豈可與世之銜麗藻而徒娛人目者同
日而論乎哉亦可以見其人與學也其門人村上恒

夫頃者校訂與今堀某謀刊而公于世龍也不得不
繫一言於其末遂題
弘化三年丙午季夏
小石龍敬跋

夫頃者校訂與今堀某謀刊而公于世龍也不得不
繫一言於其末遂題
弘化三年丙午季夏
小石龍敬跋

京都書林

麩屋町通四條下三丁目
雙岳堂一止人

額田正三郎



